

Dolzarb mavzudagi ilmiy tadqiqot

Davlatimiz rahbari ta'lim jarayonining sifati va samarasi borasida doimiy ravishda kuyunchaklik bilan tavsiya, talab va topshiriqlar berib kelishlari bejiz emas. Bu mamlakatimizning rivojlangan davlatlardagi ta'lim tizimi darajasiga yetkazish maqsadi bilan bog'liq. Ulardagi ijobiy jihatlarni o'zlashtirish va hamkorlik masalalarini jadallashtirish davr taqozosidir. Bizda o'quv-ta'lim tizimi o'quvchilarni asosan imtihonga tayyorlashga qaratilgani, aslida, ta'lim hayotga tayyorlash zarurligi borasida muhtaram Prezidentimizning o'g'itlari ulkan ahamiyat kasb etgani rost. Ilm-fan, ta'lim, ishlab chiqarish va integratsiyaning uyg'unligida hikmat ko'p. Nazariy ma'lumot va amaliy mashg'ulotning uyg'un tarzda ish tutilishi beqiyos ahamiyatga ega. Bu esa dual ta'lim tizimining mohiyatini aks ettiradi. Ma'lumki, bu ta'lim turining xosiyati shundaki, unda nazariy qism ta'lim muassasasida, amaliy qism esa korxonada o'tkaziladi. Bu Germaniya professional ta'lim tizimida keng qo'llaniladi. Ta'lim muassasasini bitkazuvchilarning ish jarayoniga, kasbiy faoliyatga tayyor holda borishida bu muhim rol o'ynaydi. Ayni paytda mutaxassislarining tajribasi, ko'nikmasi va malakasini oshirishga katta hissa qo'shadi. Bu yo'nalishdagi ilmiy tadqiqot va monografiyalar ayni kunlarda suvdek, havodek zarur. Kuni kecha muvaffaqiyatli himoya etilgan Choriev Ro'zimurat Kungratovichning "Kasb ta'limi mutaxassislarini Dual tizimi asosida kasbiy faoliyatga tayyorlash metodikasini takomillashtirish" mavzusi bo'yicha doktorlik dissertatsiyasi (DSc) xuddi shu bo'shliqni to'ldirishga xizmat qilishi bilan e'tiborga molik. Dissertatsiya o'zining dolzarbligi, yangiligi, faktik ma'lumotlarga boyligi hamda ilmiy jihatdan chuqur va teranligi bilan xarakterlanadi. Dissertatsiya ayni paytda O'zbekiston Respublikasi Prezidentining «Professional ta'lim tizimini yanada takomillashtirishga doir qo'shimcha chora-tadbirlar to'g'risida» 2019-yil 6-sentyabrdagi PF-5812-son Farmoni ijrosini ta'minlash borasida Vazirlar Mahkamasi qaroriga ijobiy va ijodiy javob ham bo'lgan desak, mubolag'a bo'lmaydi. Biz dissertantni ushbu muvaffaqiyati bilan samimiy qutlaymiz.



TIQXMMI matbuot xizmati